

Ntšwa ya ga Akani

E kwadilwe ke Baeletsi Tsatsi | E tshwantshitswe ke Manu Kongolo

E ne ya re re fa moporesidente wa Aforikaborwa a sena go itsise setšhaba gore naga e ya go nna mo totlelelong, batsadi ba ga Akani ba itse gore Akani o tlike go jewa ke bodutu. Kwa sekolong Akani o ne a tlhola a tshameka le ditsala tsa gagwe, o ne a ithuta mafoko a mašwa mmogo le go kwala le go buisa go tswa mo morutabaneng wa gagwe. Batsadi ba gagwe ba ne ba tla ka leano la go dira gore a nne a ntse a tswa bodutu: ba ne ba mmatlela ntšwa.

“O ya go naya ntšwa ya gago leina lefe?”
mmaagwe Akani a mmotsa.

“Ga ke ise ke itse,” ga araba Akani.



Ka letsatsi la ntlha la totlelelo, Akani le ntšwa ya gagwe ba simolola go tshamekela mo tshingwaneng go fitlhelela a lapa. Morago ba dula mo phaposing ya ga Akani ya boro-balo. Ba ne ba kgona go bona ditora tse di tsidifatsang tsa seteišene sa motlakase ka letlhabaphefo sekgalanyana. Ditora tseo di ne di pentilwe ka mebala e e phatshimang.

Ntšwa ya simolola go ngongorega mme Akani a e forogotlha ka iketlo. Ya simolola go binisa mogatla wa yona ka boitumelo jo bogolo. Akani a botsa, “Ke eng, ntšwa...”.



A o ka dumela? Ntšwa ya araba ka lentswe le le tebileng! “Ka letsatsi le lengwe...”.

Akani a ithaya a re o a tsenwa. A sekamela mo go yona. “O ne o reng?”

Ntšwa ya tlhatswa kgokgotso. “Ka letsatsi le lengwe,” ya ipoeletsa, e lebeletse fela kwa ditoreng. Akani a reetsa ka tlhoafalo fa ntšwa e simolola go tsaya kgang.

“Kwa borwa jwa Lejweleputswa go kile ga bo go le ditora tse pedi tse di goletseng kwa godimo. Di ne di le tsiditsana. Ke raya gore di le tsiditsana tota. E ne e le ditora tse di neng di tsidifatsa Seteišene sa Motlakase sa Orlando go fitlha ka ngwaga wa 1998. Di ne tsa fetolelwa go nna ditora tsa dikanelo mme ya nna tsa Soweto yotlhe: Ditora tsa Soweto. Dikanelo di ne di pentiwa ka ditshwantsho go dikologa ditora tseno. Ditshwantsho di ne tsa fetoga gangwe le gape. Ka dinako dingwe dikanelo tse di neng di anelwa e ne e le ka ga Nelson Mandela, mogaka o mogolo wa setšhaba. Ka dinako tse dingwe go ne go aneelwa dikanelo tsa batho ba bina tota setlhako se beta mokodue.” Ka dinako dingwe ba ne ba tlotla ka ga Lejweleputswa, Felong ga Gouta,” ga bua ntšwa.

Akani o ne a itumetse thata mme a botsa ntšwa ka tlhamalalo: “A o ntšwa ya leselamose?”



“Ke ntšwa e e tseelang batho dikgang,”
ga bua ntšwa.

Akani o ne a itumetse tota mme a tloa
go tswa mo bolaong mme a bina mmino
wa phenyo. Ntšwa e ne e mo lebile, e
ntse e binisa mogatla wa yona, e o isa
kwa le kwa. Akani a dula fatshe gape.

“Oh, ntšwanyana, tsweetswee ntlotlele kgang e nngwe
gape?” a kopa.

“Ke kopa o ntirele sengwe pele,” ga bua ntšwa.

“Nka go direla sengwe le sengwe,” Akani a tshepisa.

“Wena mpoletlele fela gore eng?”

“O tshwanetse go mpha leina,” ga bua ntšwa.

Akani a leba kwa ntle ka letlhabaphefo sebakanyana
a didimetse. Jaanong ya re a bona ditora
sekgalanyana, a tlelwa ke kakanyo.

“Orlando,” ga bua Akani, a bua jalo a lebeletse ntšwa
go bona gore a e itumelela leina la yona. Ntšwa ya se
ka ya bua sepe sebakanyana. Mme morago ya tloa go
tswa mo bolaong, ya bogola ka boitumelo ka molodi wa
pina, mme ya bina se re ka reng ka pina ya phenyo.
E ne e rata leina la yona.

“Orlando,” ga bua Akani. “Tsweetswee ntseele kgang.”

Ntšwa ya ga Akani

Written by Baeletsi Tsatsi • Illustrated by Manu Kongolo

Megopolo e re ka buang ka yona

A dintša di na le puo e di e buang? Fa go sa nna jalo, dintša di buisana jang? Ke eng se o se gakologelwang ka lekgetlho la ntšha fa go ne go twe re se ka ra tswa mo matlong a rona? O ne o ntse o dirang ka nako ya fa go ne go twe re se ka ra tswa mo matlong a rona?



Se se bonwang ka matlho

Terowa setshwantsho sa ga Akani le Orlando ba tshameka mmogo mo tshingwaneng.



Go Bala

Dira diphuruphutsho ka leinane leno! Batla mafoko mo leinaneng leno a a go bolelelang gore:

- ★ phaposiborobalo ya ga Akani e na le letlhabaphefo
- ★ Akani o ne a tshwere ntšha ya gagwe sentle
- ★ o kgatlhegela leinane le ntšha ya gagwe e le buileng
- ★ o teeletse ntšha ya gagwe ka Soweto Towers.




Go Kwala

Thusa Akani gore a se ka a borega ka nako ya fa go twe batho ba se ka ba tswa mo magaeng a bone. Kwala lenaane la dikakantsho tsa kafa o ka nnang o tshwaregile ka gone kwa gae Go Thibela go Borega.



Botaki

Itlhomele tora ya gago mo leinaneng la gago. Batla lebokoso le leleele le pampiri e e lekaneng go khurumetsa lebokoso leno mo matlhakoreng otlhe a mané. Terowa kgotsa o dire setshwantsho sa leinane la gago mo pampiring. Kgomaretsa setshwantsho sa leinane la gago mo matlhakoreng a lebokoso leno.



Tiragatso

Feleletsa leinane le Orlando a simolotseng go le bolela kwa bokhutlong jwa *Ntšwa ya ga Akani*.

